

四書地理考

四書地理攷卷九

東洞庭王濬

原名亮生著  
仲鑒

水名類

河

河出今西番之阿勒坦。爾雅河出崑崙虛色白所渠并  
千七百一川色黃百里一小曲千里一曲一直。邵氏晉  
涵曰今西寧府界西南千四百餘里有大山厥色紫黑是  
產金銀唐人所謂紫山稱斯名矣自紫山以西又南迤西  
連諸山綿亘二千餘里其卽古崑崙之虛歟。括地志阿  
憐達山亦名建末達山恒河出其南訡海出書於西河北  
隅按書字河  
字當衍黃海出東北隅其三河去山入海各三萬里

此謂大崑崙肅州謂小崑崙也禹本紀云河出崑崙二千五百餘里日月所相隱避爲光明也又曰崑崙山在肅州酒泉縣南八十里禹貢崑崙在臨羌之西卽此明矣。望按崑崙既有大小之異禹貢又指國名則崑崙所稱之地廣矣。徐氏松西域傳補注曰傳云南北有大山接通鑑注南山在于闐之南東出金城與漠南山接北山在車師之北卽唐志所謂西州交河縣地柳谷金沙嶺等以今地理證之西藏東北三百十里有岡底斯里卽古崑崙釋氏謂之阿耨達其山分四幹向北者曰僧格喀巴布當和闐正南分爲二支一支東趨爲張騫傳及此傳所稱南山以在西域之南也一支過和闐西北趨千六百餘里又西而

北折又折而東環千八百餘里統名蔥嶺蔥嶺又東趨爲天山過回疆北至巴爾坤東北而止是爲西域之北山蓋西域三面皆山惟東面缺也傳云中央有何按卽塔里木河河東流亘西域中說文曰河水出燉煌塞外崑崙山傳云東西六千餘里南北千餘里按今回疆輿地以烏道法計之南北兩山千二百餘里西自和什庫珠克嶺東至黨河五千餘里漢書據步測言也傳云東則接漢阨以玉門陽關孟康云二關皆在敦煌西界按敦煌郡有敦煌縣龍勒縣今敦煌縣治以北爲漢敦煌縣地縣治以南爲漢龍勒縣地漢志龍勒縣有玉門陽關後魏改龍勒爲壽昌史記正義引括地志陽關在壽昌縣西六里玉門關在縣西

北一十八里傳云西則限以蔥嶺今按伊犁西南善塔斯嶺卽蔥嶺之一山山上悉生野蔥傳云其南山東出金城與漢南山屬焉按葉爾羌和闐境南諸山自和闐南復東出經羅布淖爾南又東經安西州南又東經青海甘州涼州南又東經渭水南爲武功太乙諸山又東至西安府長安縣南五十里爲終南山言西域南山至此而終也傳云其河有兩源一出蔥嶺山一出于闐按河有兩原者特據兩地言之其實河有三源也河出蔥嶺者二一曰蔥嶺南河其河東源爲聽雜阿布河西源爲澤普勒善河合爲葉爾羌河一曰蔥嶺北河其河西源爲雅瑞雅爾河東源爲烏蘭烏蘇河合爲喀什噶爾河河出于闐者一其河東源

爲玉龍哈什河西源爲哈喇哈什河合流爲和闐河傳云  
子闐在南山下按南山在和闐額里齊城南五百八十里傳  
云其河北流與蔥嶺河合按和闐河二源自南山出東北  
流東源經額里齊城東西源經額里齊城西又各北流三  
百餘里合爲和闐河又東北流四百餘里至噶巴克阿克  
集之地蔥嶺北河蔥嶺南河皆自西來會傳云東至蒲昌  
海按和闐河與蔥嶺南北河旣合經阿克蘇城南有阿克  
蘇河自北來會乃合而東流是爲塔里木河東至哈喇沙  
爾城入於羅布淖爾卽蒲昌海也自和闐河蔥嶺河合流  
之地至蒲昌海千四百餘里傳云蒲昌海一名鹽澤者也  
按水經注河水又東注于勃澤卽蒲昌海也水積鄯善之

東北龍城之西南地廣千里皆爲鹽而剛堅行人所經者  
產皆布氊臥之掘發其下大鹽方如巨枕以次相累類霧  
起雲浮寡見星日少禽多鬼西接鄯善東連三沙爲海之  
北隘矣史記正義引括地志蒲昌海一名勃澤一名鹽澤  
一名輔日海亦名牢蘭亦名臨海在沙州西南傳云去玉  
門陽關三百餘里按玉門陽關在今色爾騰海之東羅布  
淖爾在今吐魯番城西南相去千餘里不得云三百餘里  
水經注作東去玉門陽關千三百餘里爲是漢書傳寫奪  
去千字傳云廣袤三百里按尙書正義引此傳文作廣袤  
三四百里今測淖爾東西二百餘里北有圓池三南有方  
橢池四澤之廣袤不能知其確數大約在三四百里間也

今本脫去四字傳云其水停居冬夏不增減皆以爲潛行  
地下南出於積石爲中國河云按羅布淖爾水潛於地下  
東南行千五百餘里至今燉煌縣西南六百餘里之巴顏  
哈喇山麓伏流始出山麓有巨石高數丈山崖土壁皆黃  
赤色蒙古語謂石爲齊老謂北極星爲噶達素謂黃金爲  
阿勒坦山麓之石遠望如北極星故蒙古名其地曰阿勒  
坦噶達素齊老伏流自壁上天池湧出歛爲百道皆黃金  
色東南流爲阿勒坦河又東北流三百里入鄂敦塔拉中  
其泉數百泓卽元史所謂火敦腦兒譯言星宿海者也又  
東南流百三十里瀟爲扎淩淖爾又東南流折而南五十  
里瀟爲鄂陵淖爾又自東北出東流五十里折而東南百



四十里又南流二百六十里折而東南三百里又東北二百四十里經阿木奈瑪勒占木遜山南麓卽大積石山漢書地理志金城郡河關縣積石山在西南羌中今在西寧府西南邊外五百三十餘里卽禹貢導河之地自古言河源者多不了獨此傳綜括詳盡所言地形與今若合符節惟謂重源出於積石仍因山海經之訛○塗按河出阿勒坦去積石幾千五百里而漢書謂南出於積石故徐君以爲訛爾○戴氏震曰白紫山西連磴石山又南迤西連接恒水所出山今番語呼岡底斯者縣亘二千里皆古昆崙之虛也磴水出磴石山與河源相去僅三百六十餘里中隔一嶺磴水亦呼磴牛河語之轉爲麗水今名金沙江又

名布賴楚也岡底斯水經注謂之阿耨達山序阿耨達山  
數水其北流者逕且末城西左會于閼葱嶺之水入鹽澤  
西流者逕于閼安息右會葱嶺西流之水入雷轟海恒水  
則南流入南海用是知岡底斯延綿而西北抵葱嶺實羣  
山之大脊也河源以南唐吐蕃今西藏之境古崑崙國在  
焉積石東北今青海之境古析支在焉而漢大宛西域踰  
葱嶺而西古渠搜在焉三地大小諸國通稱西戎繫于雍  
州者也○塗按葱嶺和閼之河皆注鹽澤潛行千五百餘  
里出阿勒坦東南流至星宿海約三百里又行千一百餘  
里至禹貢之積石而元人都實測河源則誤以積石爲昆  
侖也禹貢不言河源唯記積石漢志金城郡河關積石山

在西南羌中是也其山有九峯縣亘三百餘里河行山南  
遶東而轉西旋山之三面如玦然也又有小積石山去大  
積石尙千餘里卽唐述山也尙書後案曰元人誤以積石  
爲崑崙遂以小積石爲禹貢積石自積石至龍門河東北  
流折而北折而東又折而南難于屬詞故不言其方向龍  
門漢志在馮翊夏陽縣北隋改縣曰韓城括地志云龍門  
山在韓城縣北五十里此河西之山也東與壺口隔水相  
望通典云同州韓城絳州龍門二縣皆有龍門山是河東  
亦有龍門矣然禹貢龍門在雍不在冀自積石至龍門當  
有五千五百餘里遶史云龍門山石壁對峙高數百尺望  
之若門徼外諸河及沙漠潦水皆於此趨海雨則俄頃踰

千仞晴則清淺可涉矣又二百里南至華陰華山之北也  
此山跨梁豫二州間河在關內潼激因謂之潼關河自鹽  
澤至此凡四大折矣其初一折自積石至鄯蘭也其再折  
自鄯蘭州至豐州也其三折自三受降城至勝州東也其  
四折自勝州至華陰也自華陰東行至底柱地說云河水  
東流貫砥柱觸關流鄭注以三門爲底柱以底柱下五戶  
灘爲關流而王翰遊三門記謂底柱在三門東百五十步  
崇約三丈周數丈要之諸峯在當時總爲一巨石禹鑿而  
廣之以通河三門亦底柱也河行底柱夾兩山間其流湍  
悍至于孟津其勢稍緩可舟而渡漢志河內郡河陽縣孟  
津在其境是固在洛北亦在河北也又過洛汭杜預謂洛

汭在鞏縣南皇甫謐謂在鞏縣東北二說不同按杜云在  
南以洛之曲流言之皇甫云在北以洛之入河言之要皆  
在縣東也至隋時鞏縣移治東界則洛汭反在其西矣水  
經云河水東逕成臯大伾山下鄭康成曰地說云大坏地  
喉也沈水出坏際矣在河內修武武德之界沛沆水與滎  
播澤出入自此按鄭說謂在修武之西武德之東也此以  
河北岸之山言之水經謂逕成臯蓋以河南岸之山言之  
二說二而一者也臣瓚謂修武武德無山可當當在黎陽  
在今衛輝府東北不知爾雅山一成坏山僅一成卑淺已  
甚修武武德臨河岡阜豈無足當之乎水經以南岸之成  
臯當之則又差高大矣若大坏在黎陽則河已折而北經

文何以東字貫大伾而以北字係大坯下耶。按降水卽漳水也。降水出今山西潞安府屯留縣西南八十里盤秀嶺至潞安府潞城縣入濁漳水。亦由是有衡漳之名。漢志云漳水至安平阜城入河行千六百八十里。此漢時入河之道。禹時必更在其上游也。括地志云降水源出潞州屯留縣西南方東北流冀州入海。蓋會漳入河以入海也。蔡氏以南宮枯澤當之非也。鄭康成以其水當之亦非也。恒衛旣從錐指謂恒水出曲陽縣西北至縣東北入滏衛水。出靈壽縣東北至縣東南入滹沱。旣入之後曲陽以下之滏亦名恒靈壽以下之滹沱亦名衛。其滏水之出高是山滹沱之出泰戲山則恒衛之別源也。自周以滹沱嘔夷爲

并州之川其名著而恒衛之名遂隱於是恒衛二水僅以恒陽溪雷溝河當之其原委不過歷數十里之地曾謂是尋常之溪澗而勒禹功之荒度乎大陸鄭注謂在鉅鹿至唐人所言不一通典有二一在趙州昭慶縣一在深州陸澤縣元和志有四一在邢州鉅鹿縣一在深州鹿城縣併上爲四今按昭慶卽趙州陸澤卽深州鉅鹿卽今順德府鉅鹿縣鹿城卽今保定府束鹿縣澤在鉅鹿西北接昭慶界蓋一澤跨二縣之境也大陸宜在邢趙二州界而深州不與焉廣平日陸是處有之謂大陸爲澤者蓋大陸之旁有澤而因地以名澤也今經言大陸旣作則是其地已可耕作而澤則非可言作矣爾雅九河之次自北而南道河

者既分爲九又合爲一以一迎入而入於海逆河卽渤海也禹河入海在碣石此臣瓚說而胡渭宗之謂地理志碣石在右北平驪成縣西南計渤海距碣石五百餘里今則逆河與碣石俱淪于海或以在今昌黎縣北十里之山當之此山距海數十里非也或以海豐之馬谷山當古之碣石抑又舛矣而吳廷華獨據漢志兩碣石下無河水入海之文斷以爲逆河入海在直沽禹貢之碣石當在章武而淪于海中非驪成縣之碣石其說甚辨然亦無實據也○地理今釋曰積石山在今河州北一百二十里通典云禹施功自積石而東今西平郡龍支縣界山是也按諸家言積石者多以此爲小積石別有大積石說本漢書西域



傳至水經云積石在葱嶺北則失之矣或譏杜佑主龍支之積石因唐置積石軍于澆河故○誤攷後漢書郡國志隴西郡河關縣積石山在西南又桓帝紀燒當羌叛段熲追擊于積石注卽禹貢導河積石在鄯州龍支縣南是河州積石之名非始于唐矣○塗按此說與錐指異疑後漢志脫羌中二字若段熲追擊之積石安知非卽大積石乎○禹貢錐指曰冀三面距河而不言治河蓋舉山與地以別之壺口梁山志龍門西河之治也岳陽志南河底柱之治也覃懷志孟津洛汭之治也大陸志徒駭河之治河自大陸以北禹疏爲九道然後恒衛從而大陸作碣石志逆河之治也雖不言治河而河已無不治矣又曰孟子引書

泴水譬余泴水者洪水也此水迫近都邑堯親見其狀故  
口能言之而心實懼之正尸子所謂河出孟門之上大溢  
逆流蓋凡水逆流皆謂之洪水而龍門呂梁之河爲害尤  
甚禹受命治水無急於此者此而不治則帝都將有其魚  
之患又何暇救天下之昏墊哉馬明衡曰朱子謂治水當  
自下流始下流當自碣石九河始此意固是余竊以爲自  
下流始者此治水之大勢然上流有壅遏之甚者亦必先  
達之此治水之權宜也又曰懷縣故城在今懷慶府武陟  
縣衛漳一名泴水其入河在今廣平府肥鄉曲周二縣界  
經文所謂北過泴水者也又曰懷襄之世河從大伾以東  
早已潰決四出太史公曰行平地數爲敗是也不待鑿龍

門而始然且龍門未鑿水由地上氾濫而南亦終入於河  
河中之水不加少龍門既鑿水由地中行復其故道河中  
之水亦不加多鑿與不鑿其利害皆在冀於兗青徐無損  
益也唯覃懷底績之後河東河內大小諸水悉歸於東河  
崩騰北注向之青徐分受其患者至此兗獨當之勢甚危  
急而恒衛大陸亦瀰漫難治非先疏九河不可故經書恒  
衛大陸於田賦之下以見二役在九河既道之後不與覃  
懷之役相連也○夏允彝禹貢合注曰桓譚云河水濁一  
石水六斗泥而民競引河漑田令不通利至三月桃花水  
至則決以其噎不泄也可禁民勿復引河夫引河且不可  
況分爲九乎然則禹之導爲九河也何居蓋河不可分謂

其上流耳若入海之處泄之愈速則河愈通利又何害哉  
今九河之下卽爲逆河殆謂自此而下卽海潮逆入矣蓋  
名雖爲河實卽海也海水內吞九河外灌不惟藉水力  
以刷沙而海之潮汐亦藉河力以敵之禹之以水治水所  
爲不可及也後世不知其說而徒欲棄地以授河其名則  
大豈知水性者哉○水經注淮南子曰龍門未闢呂梁未  
鑿河出孟門之上大溢逆流無有邱陵高阜減之名曰洪  
水大禹疏通謂之孟門孟門卽龍門之上口也實爲黃河  
之巨阨○錐指曰龍支之積石至龍門約計有四千三百  
餘里若禹貢之積石更在龍支之南塞外一千二百餘里  
則自積石至于龍門當有五千五百餘里也龍門以上禹

功所不加故數千里之河總括爲一句又曰底柱之險者  
不減於龍門自古患之三門之險非鑄鑿所能除堯都平  
陽冀之烏夷及兗青徐揚荆豫之貢道必由底柱或疑其  
時亦參用陸運以余觀之三門之險不專在底柱其下兼  
有關流爲之阻蓋自底柱以東夾河羣山之水竝注于河  
禹功旣遠泥沙日積河上激六峯下阻十九灘溜波倍加  
洶湧昔人計不及此但欲鑄廣三門一試于楊焉再試于  
李齊物不惟無益而害且茲甚則以鑄石落水河身愈淺  
三門雖廣不能勝百二十里之關流故也禹治河率自下  
始度禹當日必先浚關流而後析底柱二險皆去則貢舟  
直達帝都不必參用陸運矣又曰自古論河患者皆云孟

津而下地平土疏移徙不常失禹故道然吾觀孟津以上亦不能無患其所以不至遠泛濫者徒以夾河之山脈未盡地高土堅耳然上流之怒不泄則害必鍾於下流漢明帝詔曰左堤彊則右堤傷左右皆彊則下方傷孟津之隄所謂左右皆彊則下方傷者也至滎陽則左隄強而右隄傷矣治河者欲使洛汭以東永無溢決其可置孟津底柱於度外乎又曰凡二水並行一盛則一微自然之勢也故上流宜合不宜分合則流急而沙去分則流緩而沙停而禹顧於大伾之南醜爲深川者則以河勢欲東不得不分之以泄其怒以潁川一道分河流十之一二不使指大於股亦未爲害耳及周之衰諸侯各擅其山川以爲已利於

是有滎陽下引河爲鴻溝者至定王五年河遂南徙無他河水之入鴻溝者多則經流遲貯不能衝刷泥沙故也宿胥之塞實鴻溝致之又曰大陸地也非澤也以地爲澤自班固始若爾雅十藪自當主澤言孫炎解不誤穎達引以證經之大陸則誤耳又曰堯時河從大伾山南東出或決而北或決而南汎濫充豫青徐之域禹乃斷爲二渠一引而北載之高地爲大河之經流而餘波循故道以東者名之曰漯漯川受水不多雖平地不爲害竊意禹穿地自宿胥口以至鄴東引河合漳水入海是爲北過降水耳又曰遷書疎畧頗多言北載之北地而不知大伾以東非高地也又曰地理志鄴縣故大河在東北入海水經注宿胥故

瀆受河於遮害亭東黎山西者卽王橫所云禹之行河隨西山  
下東北去者也自黎陽以下水經所稱大河故瀆一名北  
瀆俗謂之王莽河者卽周定王時所徙西漢猶行之至王莽  
時遂空者也所稱河水自鐵邱南東北流至于乘入海者卽  
王景所治東漢以後見行之河也司馬遷知引河北載之高  
地矣而不知當時所行者非禹河王橫知禹河隨西山下東  
北去矣而不能實指其地名班固知有鄴東故大河矣而不  
知其上承宿胥口酈道元知宿胥故瀆爲白溝矣而不知其  
下卽鄴東之河杜佑知衡漳至肥鄉入河矣而不知其河卽  
經北過泴水之河故自大伾以下凡降水大陸九河逆河之  
所在皆不得其真也○又曰漢河堤率謂之金隄禹引河北



載之高地使隨西山下東北去無藉於隄而亦不妨有堤李垂導河書言曹公所開運渠東北有伯禹古隄蓋鯀所作也而禹修之遂目之曰禹隄賈讓所謂東薄金隄者卽此也在今濬縣縣用之以防川而河有逆行之患禹因之以導水而河得就下之宜勝棋所用敗棋之著也○夏允彝曰汾河之源有二一出天池一出林溪山天池卽管涔山谷也鯀堤在今開州博州亦有鯀堤又名禹堤衛州亦有禹隄通名金隄一名千里隄今按汾水自管涔而下西瀕省城不數百里地卑濕又河土疏且沙淖故善徙說者謂河出山陘中勢旣得逞又值東山暴埒注下兩觸而成一勝故易徙全賴石堤堅固乃免患古爲金堤故非得已也又曰岳陽向爲堯都鯀極意

崇防但不察源委以致罔功禹先疏下流以殺河勢河流既定太原以上只修鯀功自可奏功矣○鄭康成曰下尾合名爲逆河言相向迎受○蘇氏曰逆河者旣分爲九又合爲一以一迎八而入於海卽渤海也○薛氏曰河入海處舊在平州石城縣東望碣石其後大風逆河皆漸於海舊道湮矣○錐指曰九河之所以入海而無壅者賴逆河之復合爲一也逆河旣漸於海則八枝之亾無日矣淮南水利考云海水潮汐日二至每入也以二時其出也亦二時二時之出係湖水二時之入則海水海水過湖水不得流者每日有八時黃沙寧無停乎此最精於物理者然此猶就清水言之耳若黃河則一石水而六斗泥海之所入

者沙河之所出者亦沙也以沙遇沙如膠投漆唯受以廣二百餘里之逆河翻騰入海而又有碣石以當其衝則潮汐不能踰而西內沙不停外沙不入此禹河所以千載無患也自逆河變爲勃海而潮汐直抵九河之口九河勢分力弱不足以攻沙外沙日至內沙不出徒駭猶能相敵入枝立就湮廢矣漢人不知此義而唯以九河爲急縱令穿爲四五亦不旋踵而淤耳蓋逆河旣淪則河不宜分而宜合合則行疾而湍悍力能衝刷泥沙故周定王時上流雖徙而章武入海之道自若宋北流入海之道只一獨流口闊六七百步深八九丈趨海之勢甚速其明效也又曰按水經注黎陽以上河水所過有金城天水武威安定北地

朔方五原雲中定襄雁門西河上郡河東馮翊河南河內  
凡十六郡黎陽以下大河故瀆所過有魏郡東郡清河平  
原信都勃海又六郡而班固云過郡十六行九千四百里  
殊不可曉今攷禹河所過有魏郡廣平鉅鹿信都勃海而  
無東郡清河平原過郡凡二十一也以經言之河自章武  
東出爲逆河逕屢成至繁縣碣石山入海又過郡二右北  
平遼西行三百餘里也又曰宋君臣論治河多格言神宗  
曰河決不過占一河之地或東或西若利害無所較聽其  
所趨如何又曰水性趨下以道治水則無違其性可也如  
能順水所向徙城邑以避之復又何患雖神禹復生不過  
如此此格言也然施於商河北流適得其宜若地平土疏

潰溢四出所占不止一河之地者豈亦當順水所向遷城  
邑以避之乎歐陽修曰河本泥沙無不淤之理淤常先下  
流水行漸壅乃決上流低處故大河已棄之道自古難復  
此格言也然瓠子決二十餘年而武帝塞之河復北行二  
渠河侵汴注淮泗六十餘年而王景治之仍由千乘入海  
今橫隴之徙裁二十年安見必不可復但北流實爲利便  
不當更事橫隴耳蘇轍曰黃河之性急則通流緩則淤澱  
旣無東西皆急之勢安有兩河並行之理此格言也然自  
古河未有不兩行者禹斷二渠爲萬世法自參以上則必  
敗宋之二股卽唐之馬頰以此爲枝渠受河水十之一二  
亦自無害但不可令指大如股耳張商英曰治河當行所

無事一用隄障猶塞兒口止其啼此格言也語出賈讓然  
讓意謂正道常流不可攸礙國爲之曲防耳若衝激之處  
潰溢可虞非增卑倍薄何以禦之任伯雨曰禹之行水不  
獨行所無事亦未嘗不因其變以道之此格言也然必如  
北流之合於禹迹者不妨因其勢而利導之若注鉅野通  
淮泗安得不反之使北耶此孟子所以惡執一也○尙書  
後案曰漢志右北平驪成縣大碣石山在縣西南遼西郡  
桑縣有碣石水南入官不言有山蓋驪成有大碣石則桑  
縣有小碣石可知鄒道元言滄海者蓋海水波襄偶然漸  
及山下非真泯焉蕩焉也○錐指曰史記秦始皇誓刻碣  
石門漢書武帝東巡海上至碣石此海濱之山斗入海者

故賈讓言禹之治水鑿龍門闕伊闕折底柱破碣石蓋伊  
闕類龍門夾峙兩岸水出其間者也碣石類底柱橫絕中  
流當河之衝者也折之破之不容已矣但此石不知何年  
苞淪於海水經云碣石山在遼西臨渝縣南水中鄭注云  
昔燕齊遼曠分置營州今城屆海濱海水北侵城垂淪者  
半王頊之言信而有徵碣石入海非無證矣又云今枕海  
有石如甬道數十里當山頂有大石如柱形往往而見立  
於巨海之中潮水大至及潮波退不動不沒不知深淺世  
名之謂天橋柱也酈氏言碣石淪海可據如此而後魏文  
成帝太安四年東巡登碣石山望滄海改山名樂遊蓋此  
山雖淪於海而去北岸不遠猶可揚帆攬勝不知何時復

遭邊滅今昌黎縣南海中無一山此酈氏之說所以不信  
於今也近世有郭造卿著碣石叢談以昌黎縣北十里仙  
人臺當之穴天橋柱者酈註明言在海中其又可移之平  
陸耶又曰壺口有三一在吉州西南禹貢之壺口也一爲  
汾陰縣西南之平山亦名壺口山一在長治縣東南哀四  
年齊國夏伐晉取壺口杜注潞縣東有壺口關是也孟門  
有二一在龍門山之比如尸子所言龍門未關呂梁未鑿  
河出孟門之上者卽龍門之上口也一在太行山東襄二  
十三年齊侯伐晉取朝歌入孟門是也呂梁卽梁山之別  
名梁山漢志在夏陽縣西北而諸志所言不同蓋是山綿  
亘百里自今郃陽西北抵韓城西北皆梁山然向南則益



西而去河愈遠惟韓城西北之山首枕西河北連龍門當以是爲禹鑿之跡耳岐山在今岐山縣晁以道用水經注以爲呂梁狐岐皆冀州山河水所經治之以開河道也案呂梁在今永寧州東北一名穀積山去河一百五十餘里狐岐在今孝義縣西去河三百餘里安得謂河水所經乎晁說甚謬曾彥和云壺口梁岐一役也不可分言於二州故并言於冀愚謂禹貢書法亦有變例凡山皆係本州而雍之梁岐獨書於冀也治梁以除河患而遂及岐者何也蓋地上之積潦未經疏洩不可以耕作故併治之爲帝都艱食計也河道通而汾水之來始有可受然後修縣之功太原在平陽東北今之晉陽也岳陽就附近山南者言之

則爲今岳陽趙城二縣然經之所主亦不止此二縣揚雄  
冀州牧箴曰岳陽是都則冀都平陽亦岳陽也覃懷二字  
共爲一地曾氏曰覃懷平地當在孟津之東太行之西懷  
襄之時平地致功爲難故曰底績地形南北爲從東西爲  
橫河北流而漳東流注之則河從而漳橫矣夏氏偁曰冀  
州三面距河河爲大患故所治自壺口至衡漳皆所以治  
河之害與夫別流之入於河也按恒衛皆於文安入河禹  
必先道九河而後治恒衛從河以入海不然海口壅塞雖  
欲治二水不可得也大陸地形滂下東有大河北有恒衛  
瀰漫之勢平田旣成巨浸至是乃濬其畎澮達於支川其  
澤亦爲之陂障以資蓄洩而耕作以興故復言旣明其非

一役也九州之末各載其通於帝都之道傳以爲禹治一州之水旣畢遂還帝都白所治鄭康成謂治水旣畢更復行之觀地肥瘠定賦高下王肅謂詳記各州往還乘涉之事皆非也周希聖謂天子之都必求其舟楫所可至使夫諸侯之朝貢商賈之貿易雖其地甚遠而其輸甚易此說得之又曰河自禹告成後下迄元明凡五大變而暫決復塞者不與焉一周定王五年河徙自宿胥口東行漯川至長壽津與漯別行而東北合漳水至章武入海二王莽始建國三年河決魏郡至千乘入海三宋仁宗時商河決河分爲二派北流合永濟渠至乾寧軍今青入海東流合馬頰河至無棣縣入海四金章宗明昌五年河決陽武分爲

二派一由北清河入海一由南清河入淮五元世祖二十六年會通河成北派漸微及明宏治中築斷黃陵岡支渠遂以一淮受全河之水是也○地圖綜要曰周用諭黃河每歲冬春之間自西北演迤而來未見爲害及夏秋霖潦時至吐洩不及震蕩衝激考之前代決於夏月者十之六七秋月十之四五冬月蓋無幾焉周用又言河之不安其流由于阡陌之壞溝洫不修誠確論也古之溝洫卽今之渠今江南之地水患鮮者以渠多而水勢分也誠若古者溝洫之法豈止可平河患抑且可興民利一旦有弊又可禦戎馬是爲寓武備于農功資人和于地利者也

海

海論語浮海指勃海孟子舉於海指楚藪澤○說文海天池也以納百川者又云潕勃潕海之別也○潛邱劄記云太史公多言勃海河渠書謂永平之勃海也封禪書謂登萊之勃海蘇秦列傳指天津衛之海朝鮮列傳指海之在遼東者勃海之水大矣非專爲近勃海郡者也○姚氏鼎曰楚地不至於海孫叔敖薦芈賈之子亦非居海濱者也蓋藪澤亦謂之海荀子孫叔敖期思之鄙人也○彙纂云固始縣東北有蓼城岡卽古蓼國又云期思古蔣國今在固始縣西北七十里○毛氏奇齡曰淮水逕期思之北而東注于海以淮通海故稱海○劉熙釋名云海晦也其水黑如晦也○孫炎注爾雅云海晦也晦闇于禮儀也○

璽按寢邱乃沈國之別邑先爲楚所得者明思卽其地

四書地理攷卷十

東洞庭王壘

原名仲壘

亮生著

水名類

汶

汶出今泰安府萊蕪縣○釋地曰有徐州之汶有青州之汶此指徐州言也○王氏昶曰前漢書于泰山郡萊蕪下云禹貢汶水出西南入濟又于琅琊郡朱虛下云東泰山汶水所出東至安邱入濰按水經汶水出泰山萊蕪縣原山西南過嬴縣南又南過奉高縣北又西南至安民亭入濟又云汶水出牟婁縣泰山北過縣東又北過淳于縣西又東北入于濰是則萊蕪之汶由西南行入濟朱虛之汶

由東行入濰以達于海二汶固不同矣以今地理核之汶  
河水有數源其經流一自萊蕪縣原山之陽發源一自泰  
安縣泰山之北仙臺嶺發源至故縣鎮二水合流謂之大  
汶河又西南與萊蕪牟汶羸汶會牟汶之源有二合流會  
于羸汶羸汶之源亦有二分流入于牟汶由是俱合于大  
汶又西與北汶會北汶本于泮水自泰安縣泰山西發源  
東南流有石汶水入之又東合大汶又有小汶水自新泰  
縣東北龍堂山南麓發源至柴城謂之柴汶亦合于大汶  
此汶之名不一也詩言汶蓋指大汶言之酈氏又云汶水  
逕鉅平縣故城而西南流城東有魯道詩所言魯道有蕩  
者也按成二年齊侯伐我北鄙酈注龍在泰山博縣西



用桓三年公會齊侯于贏注齊邑今泰山贏縣哀十一年  
會吳子伐齊克博壬申至于贏然則贏博以南屬魯界龍  
以北屬齊界故成二年取汶陽田蓋汶之南皆魯地也齊  
魯往來孔道實在贏博當今寧陽東平間故襄公之來會  
由之也○塗按齊乘云齊有三汶入濟之汶見禹貢入濰  
之汶見漢書入沂之汶見水經注所謂更固水東經蒙陰  
者也一統志云汶有二源一出臨朐縣沂山卽瀑布泉一  
出縣西南嶧山北流七八里與沂山水合亂流逕縣北三  
里又東入濰此二水皆朱虛之汶也○雖指曰元和志乾  
封縣界有五汶原別而流同五汶者北汶贏汶柴汶牟汶  
其一則經流也按酈注無贏汶五汶之外有小汶在州東

南七十里源出官山流逕徠山南又西入汶水所謂大汶口也羸汶合牟汶故鄆不言五汶以小易羸斯爲當矣  
○趙氏一清曰泰安圖志羸汶與牟汶合自萊蕪縣至泰安縣與仙臺嶺水會名曰大汶亦曰塹汶又西南流與石汶合石汶者環水也又西南流與北汶合北汶者泮水也四汶共流而西南小汶水會之小汶出新泰縣至泰安縣逕徠故柴城北而合于大汶尋其川脈卽古柴汶之道柴汶出梁父縣至陽關城南而西合于汶今梁父縣東之上源已絕而下流僅至古柴城卽合于大汶然小汶之行甚遠倘古有是水道元無容不記此必溝通之以合于柴汶其後水流旣盛而柴汶遂爲所奪大汶小汶之名皆起

于後世彼以合羸牟北石四汶故名之曰大此則專合柴汶故名曰小是五汶者又并爲二以出于大汶蓋羸牟二汶由東達西橫水也北石二汶由北注南直水也柴汶出東北以注西南亦橫水也五汶之名不當去羸道元不別出羸汶者以羸爲發源經流也○璽按寰宇記據述征記以澄汶當五汶之一按水經注引地理志曰靈門縣有高栒山與崕一山浯水所出東北入淮說文云水出靈門山世謂之浯汶矣在今莒州與萊蕪之水無涉也

### 川上

川上疑在今兗州府泗水縣○釋地曰相傳卽泗水發源處今之泉林寺在泗水縣東五十里陪尾山下四源竝發

會而成溪是爲泗水○璽按此說不必拘水經注洙水西南至魯縣東北分爲二流北爲洙南爲泗水孔子設教于洙泗之間是闕里故在川上也

### 沂

沂在今兗州府曲阜縣○大事表曰沂水在今曲阜縣南二里西入滋陽縣境合于泗水論語所謂浴乎沂卽此齊亦有沂水今沂州府沂水縣西北一百七十里雕崖山接蒙陰縣界南流至江南淮安府宿遷縣北匯爲駱馬湖又南入運河書淮沂其乂是也又出武陽之冠石山者亦謂之沂水在今兗州府費縣俗呼小沂水哀二年取沂西田是也○水經注沂水出魯城東南尼邱山西北平地發泉

流逕曾縣故城南沂水北對稷門亦曰雩門門南隔水有雩壇又西逕國邱北又西右注泗水○元和志沂水亦名雩水源出縣東南八里荆澤詩駟駟牡馬在荆之野是也○一統志此沂水齊乘謂爲西沂又云曲阜縣境凡二十入泉入泗者七由沂入泗者二十有一溫泉在曲阜縣東南十里雖沍寒時水常暖可浴卽曾點浴沂處也西北流入沂河○導按水經沂水出泰山蓋縣艾山水經注云小沂水出黃孤山又云治水出太山南武陽之冠石山世俗謂此水爲小沂水是論語沂水之外又有三沂水也

世

津問津處在今南陽府葉縣○寰宇記河東縣蒲津關在

縣西二里卽子路問津之所又曰長垣縣又名蒲邑子路  
隨夫子於此問津卽蒲邑之津也又云葉縣黃城山下有  
東流水卽子路問津所又云閿鄉縣蒲城子路爲孔子問  
津之所○水經注方城山水東流注漁水故地理志曰南  
陽葉方城邑西有黃城山是長沮桀溺耦耕之所有東流  
水則子路問津處尸子曰楚狂接輿耕于方城蓋于此也  
盛宏之云葉東界有故城始讐縣東至瀨水逕此陽界南  
北聯聯數百里號爲方城○塗按長字記于葉縣旣載問  
津處則河東長垣閿鄉可知其誤

漢

東漢水出今漢中府畧陽縣西漢水出今秦州○洪氏亮

吉日山海經漢水出鮒魚之山水經沔水出武都東狼谷如淳曰此方人名漢水爲沔水今按漢書地理志武都郡沮縣沮水出東狼谷南至沙羨南入江與水經所言出東狼谷同是沮水卽漢水又名沔水也今畧陽縣本漢武都郡沮縣地在沔縣西四十里畧陽縣東南有大丙山左思蜀都賦嘉魚出于丙穴注丙穴在漢中沔陽縣樂史云大丙山小丙山並在順政縣東南七十里北有穴有水潛流土人相傳爲丙穴沮水經穴門而過或謂之大丙水按今之大丙山卽山海經之鮒魚山也東狼谷卽鮒魚山之別名或谷在山左近總之漢水出鮒魚山西漢水出嶓冢山又氏道之漾水亦出嶓冢山以班志考之西漢水出嶓冢

之西則漾水當在嶓冢之東故至武都合沮亦有東漢水  
之目今氏道廢縣已無攷矣自魏收始誤以華陽郡嶓冢  
山爲漢水所出而後人如杜佑李吉甫皆承其誤也又攷  
班志沮水過郡五乃武都漢中南陽南郡江夏也若今之  
寧羗州爲漢廣漢郡葭萌縣地西漢水所經東漢水並不  
經其地後人以州北之嶓冢山附會爲沮水之源誣矣至  
氏道之漾水至武都沮縣已合于沮二水合乃有沔水之  
名也○說文漾水出隴西獫狁道東至武都爲漢又曰沔水  
出武都沮縣東狼谷東南入江○段氏玉裁曰獫狁道不屬  
隴西當作氏道乃與漢志合鄭注尙書曰漾水出隴西氏  
道至武都爲漢至江夏謂之夏水又注梁州沔潛云潛蓋



西漢出嶓冢東南至巴郡江州入江行二千七百六十里  
班鄭皆謂東漢西漢同出嶓冢與今水道不合○尙書後  
案曰水經注敘西漢源流其中合濁水則與東漢通矣逕  
通谷又與東漢通矣至寒水注之則卽郭璞所謂東漢一  
支從沔縣南流至漢壽入大穴中通峒山下西南潛出而  
入西漢者亦卽鄭梁州注所謂漢別爲潛其穴本小水積  
成澤流與漢合大禹自廣漢疏通卽爲西漢水者亦卽水  
經注所云葭萌西漢鄭康成之所謂潛水者也西漢出自  
山源似非漢別但從沔陽伏流至葭萌者係漢別之潛而  
此潛旣與西漢合則通西漢上源皆得名潛又以潛沔通  
流故可以西漢山源冠東漢水也○水經注云漢中記曰

蟠冢以東水皆東流蟠冢以西水皆西流卽其地勢源流所歸故俗以蟠冢爲分水嶺○鍾指曰郭璞爾雅音義云有水從漢沔陽縣南流至梓潼漢壽入大穴中通峒山下西南潛出一名河水舊俗云卽禹貢潛也括地志潛水一名復水今名龍門水源出綿谷縣東龍門大石穴下此梁州之潛也在今廣元縣廣元舊志云源出縣北木寨山與括地志不同意者木寨山乃水自沔陽來之所經而人誤以爲出歟水經注西漢卽潛水自沔漢溯流而屆于晉壽界阻漾枝津南厯岡穴迤邐而接漢沿此入漾書所謂潛潛而逾沔矣以今輿地言之浮嘉陵江至廣元縣北龍門第三洞口舍舟從陸越岡巒而北至第一洞口山谷乘舟

至沔縣南所謂浮潛通沔也又曰韻會潛出伏流也荊州之潛雖不如出龍門石穴之奇亦必漢水伏流從平地涌出故謂之潛承天府志云漢水自鍾祥縣北三十里分流爲蘆伏河經潛江縣東南復入于漢卽古潛水也按潛江縣本漢竟陵江陵二縣地今漢水之分流者名蘆伏而其地又名白狄皆取狄流之義此水起鍾祥縣北訖潛江縣東南行可三百里以爲古之潛水庶幾得之○樊氏延間曰導嶠冢至于荆山內方至于大別荆山在今襄陽府南漳縣西南內方地理志云章山在江夏竟陵縣東北古文以爲內方山在今安陸府鍾祥縣胡渭曰禹貢三澨當在潛水入漢處一在襄城北卽大隄一在樊城南一在三洲

口東皆襄陽縣地易氏曰漢水自滄浪洲東南流三百六十里至襄陽縣境大別鄭元云在廬江安豐縣杜預以爲非是元和志魯山一名大別山在漢陽縣東北一百步水經云又南至江夏沙羨縣北南入于江註庾仲雍曰夏口一曰沔口矣左傳謂之夏口自此則滙澤爲彭蠡在注江之後鄭元曰滙回也漢與江關轉東成其澤矣○地理志武都東漢水受氐道水一名沔過江夏謂之夏水入江錢氏埭曰武都在今階州成縣西漾漢一源志不言水所出山遂迷漾水之原而後人復以爲東漢水出今寧羗者非矣水經注引庾仲雍云獻水南至關城合西漢水是當有一水從徽縣南下至陽平關與東西二漢相通今則山坡

零雜無從究辨求所謂獻水渺不知所在矣今漢水從寧  
羌州北東南流折東逕沔縣南褒城縣南又東南逕漢中  
府城西南又東逕成固縣南洋縣西西鄉縣北又東南逕  
石泉縣南折南逕紫陽縣西南折東逕興安府城北洵陽  
縣南白河縣北折北又東逕鄖西縣南鄖陽府城南均州  
東北又東南逕光化縣西南又南逕穀城縣西折東逕襄  
陽府城北折南逕宜城縣東安陸府城西荊門州東又東  
逕潛江縣北天門縣南沔陽州北漢川縣南至漢陽府城  
東北武昌府城西入江云過江夏謂之夏水漢水東合夏  
水漢水亦得夏水之稱矣○沮沮水出東狼谷南至沙美  
入江過郡五行四十里荊州川錢氏站曰沮縣在今漢中

府畧陽縣東南一百二十里東漢水之別源也東狼谷在畧陽縣東北沮水逕縣東合漢云南至沙羨入江者卽漢耳過郡五武都漢中南陽南郡江夏也○氏道禹貢養水所出至武都爲漢錢氏站曰養卽養字氏道在今秦州清水縣西南縣在上邽之東南下辨之東北則養水亦出嶓冢山其明徵矣隴坻山阪零雜溪澗糾互衆流莫析以今證古則水從嶓冢東南流逕故河池而合泉街水蓋今黑谷水之源似卽養水之源濁水之流似卽養水之流但自酈氏以後俱衍黑谷水入濁濁水入西漢爲說而莫曉山坂紊糾二水互通之緣遂令迷于所始是談地理之一蔽也余奉檄委窮涇渭二水道徑秦隴之間熟悉其處故知

禹貢暨本志之文皆無所誤證以山海經蟠冢之山漢水出焉東流注于沔水經蟠冢山在氏道南二說更信言之非舛矣○西禹貢蟠冢山在西西漢水所出南入廣漢白水東南至江州入江過郡四行二千七百六十里錢氏站曰西在今秦州西南一百二十里蟠冢山在今秦州西南六十里白水墊江也墊江至昭化縣北合西漢水○鑿按近儒皆疑東漢之不出蟠冢惟錢氏之說最爲明晰故備錄之

淇澳

淇在今衛輝府輝縣彰德府林縣○說文水出河內其北山或曰出隆慮西山○山海經北山經沮洳之山瀑水出

焉南流注于河注云今淇水出隆慮大號山東過河內縣南爲白溝郝氏註曰沮洳之山在今河南輝縣○水經淇水出河內隆慮縣西大號山注云自元甫城東南逕朝歌縣北○地理志出河內共縣北山東至黎陽入河○通典淇水至衛州衛縣界入河謂之淇水口古朝歌也衛居河淇之間○詩地理攷呂氏曰泉水卽今衛州共城之百泉也淇水出相州臨慮縣東流泉水自西北來注之故曰亦流于淇○錢氏坫曰肥水在衛博物志謂之澳水亦詩所謂泉源之水矣水有二原一出朝歌城西北東南流與左水合左水謂之馬溝水出朝歌城北異出同流之謂也在今衛輝府淇縣○邵氏晉涵曰說文隄水隈崖也詩釋



文引孫炎云水曲中也詩疏引陸璣云淇澳二水名劉昭郡國志注引博物志與水流入淇水水經注云肥泉博物志謂之澳水案劉昭酈道元所引與陸璣說同然肥泉卽泉源之水俱見衛風不得以爲與水爾雅以隈釋隤毛傳因之是淇澳非二水名也

### 四海

四海或以水言或以地言或泛指天下言○塗按尙書外傳四海康成謂四面相距爲方萬里七千里內爲九州其外爲四海爾雅九夷八狄七戎六蠻謂之四海此指地言之也書言決九川距四海言通九川于海孟子四海爲家此指水言之也周禮鄭注四海猶四方也孟子定四海之

民中庸富有四海此則泛指天下言耳然以地言海則四海可以實徵以水言海則四海不可以確驗左傳南海北海指齊楚孟子東海之濱劉昭謂在瑯琊海曲縣北海之濱當指遼西郡令支縣漢書有東海郡北海郡南海郡獨無西海郡王莽欲立之至獻帝時始立西海郡是以地言海可據史傳以攷其地也顧亭林言禹貢東漸于海入于南海不言西海北海南海者猶西河止一河也禮記曰祖天地之左海也明右之無海矣洪邁曰海一而已地勢西北高東南下北至青滄曰北海東漸吳越曰東海南至交廣曰南海其實一也無有所謂西海者屈子賦云指西海以爲期蓋寓言也然程大昌謂條支之西有西海先漢使

固嘗見之而著于史西海之西有大秦夷人與海商相來  
往唐書又言突厥部北海之北有骨利幹國在海北岸是  
實有西海北海者洪稚存亦力辨有西海北海山海經之  
紀大荒有東海西海南海北海又有西北海西南海東北  
海東南海則是天地之勢四邊有水九州皆居水內故謂  
之州州古之洲字四海固環乎四裔也此以水言四海有  
不可以實驗者矣

### 水汧

水汧疑在漆水沮水渭水之側○詩自土沮漆傳云沮水  
漆水也箋云公劉失職遷于豳居沮漆之地正義云此沮  
漆謂在豳地但二水東流亦過周地故下傳云周原沮漆

之間是周地亦有漆沮也○率西水許傳云率循也清水  
厓也箋云循西水厓漆沮水側也疏云循西方水厓漆沮  
之側東行而至于岐山之下○周原應應傳云周原沮漆  
之間也○自西徂東周爰執事箋云幽與周原不能爲西  
東據至時從水許言也正義曰幽在周原西北而經言自  
西便是從其正西而來故辨之鄭志張逸問幽與周原不  
能爲東西何謂答曰幽地今爲柤邑縣在黃山北沮水西  
有涇水從此西南行正東乃得周故言東西云岐山在長  
安西北四百里幽又在岐山西北四百里如志此言發幽  
西南而行從沮水之南然後東行以適周也○詩地理攷  
曰沮漆名稱相亂水經云沮水出北地郡直路縣東過馮

翊殺翊縣北東入于洛此沮水之源流也漢志扶風有漆縣漆水在縣西東入渭此漆水之源流也沮自沮漆自漆也至孔氏引水經云沮水俗謂之漆水又謂之漆沮則名稱相亂矣諸家書解以出扶風之漆水與出北地之沮水爲二謂扶風之漆水至岐山入渭在澧之上流而書言渭水會涇之後乃過漆沮則漆沮在澧水涇水之下流故以書之漆沮爲出北地之漆沮與詩扶風之漆別也但水經出北地者止是沮水而謂之漆沮耳如上所言則詩之漆沮自是二水書之漆沮止是一水卽詩之沮也然水經之沮入洛書之漆沮則入渭沮水若爲漆沮一名洛水則漆沮卽洛也而又云入洛何也姑闕之以俟知者○又曰縣

詩沮漆指幽國是漆沮之上流也周原傳漆沮之間指岐周是漆沮之下流也吉日及潛言漆沮指鎬京當亦去岐周不遠也史記正義云二水源在雍州西其名洛水者在雍州東又曰十三州○志萬年縣南有涇渭北有小河卽沮水也○禹貢古今合註日程大昌云漆沮在雍名凡四出厥詩之謂漆沮者普潤之漆水也大王文王之都在岐而普潤者岐地也禹貢之謂漆沮者卽富平縣石川河至白水縣入洛而與洛水俱自朝邑入渭者是也以其在涇下故也若邠州雖有漆水而其地在邠邠乃公劉所都則不爲縣詩之漆沮矣鄭白二渠自雲陽谷口來入石川河石川河旣爲漆沮故世亦誤認二渠以爲沮漆也○塗按

繇詩正指鹵地言而程氏以爲指岐地言舛矣當由泥毛傳周原漆沮之間而云然○程大昌雍錄曰禹貢止有漆沮秦漢以後始有洛水諸家言洛卽漆沮所謂洛水者地理志曰出北地郡歸德縣戎夷中今按其水自入塞後逕鄜坊同之三州乃始入渭孔安國輩謂自馮翊懷德縣入渭者是也漢懷德同州衙縣也所謂沮水者長安志曰自邠州東北來至華原縣南流乃合漆水入富平縣石川河石川河者沮水正派也所謂漆水者自華原東北同官縣界來南流入富平縣石川河是爲合沮之地此三水合分之詳也若槩三水而命其方則漆在沮東至華原而西乃始合沮沮在漆西旣已受漆則遂南東而合乎洛洛又在

漆沮之東至同州白水縣則遂混爲一流故曰洛卽漆沮者言其本同也○段氏玉裁曰蓋漆水出豳地漢漆縣以水爲名西南流至周岐地漢人皆審知形勢今則茫昧難詳矣說文及水經云出杜陽岐山者容舉其近源言之○汪氏龍曰山海經瑜次之山漆水出焉地理志右扶風漆縣漆水在縣西關駟曰漆水出漆縣西北至岐山東入渭此涇西之漆注涇以入渭者也關駟曰有水出杜陽縣岐山北漆溪謂之漆渠西流注岐水水經注杜水東南流合漆水水出杜陽之漆溪謂之漆渠南流注岐水至美陽縣注於雍水隋書地理志扶風普潤有漆水此涇西之漆合杜岐雍以入渭者也說文澶水出北地直路西東入洛水



經注濁水入沮至白渠俗謂之漆水又謂之漆沮水此涇  
東之漆入洛以入渭者也○錢氏站曰漆水同出命山一  
流南入杜一流北入涇俱得漆水之名○王氏引之曰胡  
朏明謂徧考羣書邠地有漆無沮謹案士當從齊詩讀爲  
杜杜水名在漢右扶風杜陽南入渭今屬麟遊武功二縣  
漆水在右扶風漆縣西北入涇今屬邠州沮當爲徂自土  
徂漆言公劉去邠適豳自杜水往至於漆水也下章率西  
水滸專指漆水言此漆水在涇西與禹貢小雅周頌之漆  
沮在涇東者不同若以此爲涇東漆沮則與邠地無涉以  
邠在涇西故也且漆沮是一水之名故詩書皆二字連稱  
分言之則謬矣又曰率西水滸箋曰循西水隄沮漆水側

也毛鄭詩攷正曰邠值岐北而少東孟子言去邠踰梁山梁山在今乾州西北五里此涇西岐東渭北之梁山正當邠之南踰梁山則不浮涇水入渭也率西水濟者既踰梁山自東向西循水厓而上皆馬行不舟楫水濟渭水北厓也箋未審於地勢邠之漆水北流注涇非適岐所取道程泰之雍錄云渭水在梁山之南循渭西上可以達岐間百詩云自邠抵岐二百五十餘里梁山適界乎一百三十里之間二說可據以證箋之誤謹案如考正說太王循渭水北厓而至于岐山之下則當云率北水濟不當云率西水濟矣且詩敘太王去邠遷岐之事自當始于邠而終於岐不當始於梁山之南渭水之北而略去自邠至梁山百餘

里之地也爾雅云率自也西邠之西也大王自邠西漆水之匡南行踰梁山又西行至于山之下故曰率西水滸至于岐下毛鄭皆訓率爲循循漆水而西則非適岐之道故致後人之疑○塗按康成明言邠在沮水西不得謂邠無沮水且沮者沮洳之謂水之名沮者獨多荆有沮漳兗有灘沮洳亦名沮詩言彼汾沮洳攷幽地之水甚多豈無足當沮者耶程泰之謂沮水自邠州東北來禹貢合註圖邠州有沮水而漆入之又史記先言渡漆沮後言踰梁山則水滸在梁山之前自當兼指漆沮言之惟幽在岐之東北鄭志云從此西南行正東乃得周方向稍誤而疏屢言幽在岐西北則與地理不合者也



四書地理攷卷十一

東洞庭王鏐

原名仲鏐亮生著

水名類

九河

九河在成平之南鬲縣之北今交河縣東有成平故城德州北有鬲縣故城○李巡曰徒駭者以徒衆起故曰徒駭太史大使徒衆通其水道馬頰河勢上高下狹狀如馬頰覆鬴水多渚其渚往往而處狀如覆釜胡蘇其水下流胡下也蘇流也簡大也河水深而大也絜言河水多山石治之苦絜絜苦也鉤盤言河水曲如鉤屈折如盤也鬲津河水狹小可鬲爲津○墨子灑爲九澮○淮南子別河而道

九岐高誘注剔洩去也九岐河水播岐而爲九以入海也

○錢氏坵曰九河見於地志者三成平徒駭東光胡蘇鬲

縣鬲津今交河東光二縣及德州太史簡潔在今南皮縣

馬頰在今安德縣覆瞞在今德州鉤盤在今樂津縣○塗

按爾雅九河之序徒駭太史馬頰覆釜胡蘇簡潔鉤盤鬲

津就許商之言攷之徒駭在成平胡蘇在東光鬲津在鬲

縣徒駭最北鬲津最南徒駭是河之本道東出分爲八枝

太史馬頰覆釜當在成平之南東光之北簡潔鉤盤當在

東光之南鬲縣之北邢曷云自鬲津以北至徒駭相去三

百餘里成平今獻縣也方輿紀要以徒駭歸獻縣是也太

史河自昔無攷元史地理志謂在滄州南皮縣治北馬頰

河朔一統志謂在東光縣界通典云安德縣有覆釜河畿  
輔通志謂安德故城在今山東陵縣德平界胡蘇河漢書  
東光縣有胡蘇亭今寧津也齊乘謂滄州南有大漣澱西  
踰東光東至海非胡蘇歟大漣澱南至西無棣有大河名  
曰沙河此非簡潔等河歟潔河金史志謂在南皮方輿紀  
要謂在渤海與簡相近鉤盤河漢書平原郡有般縣師古  
注謂卽鉤盤般縣故城在今德平縣東北河在縣南二十  
里河朔府志謂九河俱經南皮今攷徒駭所經卽漳水滹  
沱所行者自獻縣交河青縣靜海大城寶坻至天津注於  
渤海彼德平樂陵齊河濟陽慶雲海豐有土河以爲徒駭  
者非也徒駭豈反出焉津南哉則南皮無徒駭惟太史簡

潔覆金當經其縣耳○胡氏渭曰九河所在後人率多附會其名爲某河者未必卽古之九河不名爲某河者又未必非古之九河○吳廷華曰禹貢言九河第謂之道孟子言九河第謂之疏則不過因勢疏濬非強鑿九河以激之行且按水經如桑乾漳衛白潞巨馬沙冶諸水俱世所謂巨浸視灘沮滯滯有過之無弗及而禹貢第載衡漳之名他水曾未之及豈桑乾諸水禹時尙微無待於治耶抑治之而經有缺文耶竊謂禹斷無平地鑿九河之理桑乾諸水斷無不治自安之理所謂九河者豈卽從桑乾諸水中就其近河者而分河以寄之則言九河而諸水悉舉矣○靈壽縣志曰明錢榎云班固以滹沱爲徒駭未必無據禹



詩黃河北流西山諸水皆東注入河滹沱其一也滹沱正  
在大陸北九河卽恆山以東諸水逆河卽易水逆與易音  
相近呼稍訛耳黃河自南而北易水自北而南故曰逆河  
相合東行趨八直沽故曰同爲逆河入於海蓋直以今保  
定直定諸水爲九河皆天作之川禹特疏而合之而非分  
河之謂也又謂漢唐諸儒以九河在滄州南皮東光間者  
皆非滄州南皮東光皆在大陸正東且濱海矣又何藉于  
分播耶大陸北播經有明文滹沱爲北播之始易水爲北  
播之終其說似是但如此則禹貢九河旣道之文應在冀  
州不當在兗州矣洪荒之事本難臆斷存之以備一說可  
也○謝氏身山曰河水出積石之西寒涼之甚者但水雖

堅流于衆石之間則不能濁此積石以西之水所以最清  
至積石東漸遇柔虛之土所以漸濁水降土升隨之而去  
則溝底漸下今觀底柱以上地高河低則水降土升確然  
可見滎陽以下則水復上升土復下降此河底所以曰高  
然黃河之水萬里奔濤直趨而下又何能使之暫停于上  
以取其泥哉聖人於此再四躊躇乃於河外加河而作逐  
一遞濬之法遂將一河播爲九道每至夏秋水涸之後乃  
以八河通流注海一河間斷上流之口使河底之淤盡露  
然後濬而去之則此一河之內無淤塞之泥因而遞及一  
歲必深濬一河九歲必各濬一次周而復始永濬勿廢萬  
載可無患焉

濟

濟出今懷慶府濟源縣西八十里王屋山○濟源記曰山海經王屋之山澗水出焉澗沅聲相近濟之爲水瑩潔如玉性下勁疾貫大河而不濁有東池有西池自王屋山頂流入太乙池乃伏流地中東行九十里復見此滙爲二池地志謂東源周迴七百步其深不測西源周迴六百八十五步其深一丈合流至溫縣歷虢公臺西南入于河自今觀之東池卽東源周僅百餘步亦不甚深西池卽西源周如東池深纔三四尺耳王屋山頂太乙池亦涸矣○說文沛沅也東入于海○段氏玉裁曰郡國志河東垣有王屋山沅水出河內溫濟水所出王莽時大旱遂枯絕水經注

曰濟水故瀆在溫當王莽之世川瀆枯竭其後水流徑通  
津渠勢改尋梁脈水不與昔同是在西漢以後所謂東流  
爲濟入于河者已非禹蹟之舊矣許云東入于海此謂禹  
時故道獨行達海故謂之瀆今之大清河小清河非無濟  
水在其閒而混淆莫辨矣又曰前志垣縣下曰禹貢王屋  
山在東北沅水所出東南至武德入河軼出滎陽北地又  
東至琅槐入海過郡九行千八百四十里過郡九者河東  
河內陳留梁國濟陰泰山濟南齊郡千乘也○括地志云  
沅水出懷州王屋縣北十里王屋山頂崖下石泉停不流  
其深不測至縣西二里平地其源重發而東南流爲沅水  
○尙書後案曰武德入河南直成皋者禹迹也水經所敘

縣河南直鞏縣者則所謂津渠勢敗也今其故道又盡  
陷河中沛水惟從枝津之合溴水者至孟縣東南入河南  
直孟津縣其流益短自禹以來沛水入河之道凡再變愈  
徙而西又曰沛水自東平以下唐人謂之清河至宋又有  
南北清河之名河渠志云熙寧十年河決澶州徙而南東  
滙於梁山張澤滌分爲二派一合南清河入於淮一合北  
清河入於海南清河卽泗水北清河卽沛瀆也南渡後北  
清河又有大小之分蓋自劉豫導濬東行始齊乘以大清  
河爲古濟水小清河爲豫所創志家皆沿其說今以水經  
注元和志寰宇記諸書攷之沛水最南濕水在中河水最  
北今者小清所經自歷城以上至東阿固皆沛水故道而

自歷城東北如濟陽齊東青城諸縣則皆古濕水所行蒲  
臺以北則古河水所經蓋宋時河嘗行濕瀆及河去則大  
清兼行河濕二瀆其小清所行則斷爲沛水故道也○樊  
氏廷簡曰濟水發源於冀經流於豫分流於徐入海於青  
故濟有河北之濟有河南之濟禹貢沅水東流爲濟此北  
濟也屬冀州溢爲滎東出於陶邱北此南濟也屬豫州又  
在徐州爲魯濟至青州爲齊濟禹貢滎波既豬導菏澤被  
孟豬此豫州也大野既豬東原底平此徐州也浮于汶達  
于濟此青州也濟河惟兗州傳云東南距濟西北距河正  
義曰濟河之間相去路近兗州之境跨濟而過東南越濟  
水西北至東河也雷夏既澤離沮會同晁氏曰爾雅云自

河出爲澗濟出爲澮求之於韻沮有楚音工水河濟之別也茅瑞徵曰河濟爲兗州二大水澗沮其支流也二水並治而兗境無復水患矣○鹽按孔傳濟水入河並流正義則以爲河濁濟清南出還清故可知也蘇軾則以爲以味別也按濟少河多濟入河則清濁不復辨其出還清故知爲濟二水旣合則味不可辨其溢爲滎也味與濟同故知爲濟二說未嘗不可通而林之奇必駁之過矣○樊氏曰吳澄曰濟入河潛行地下溢爲滎澤溢者言如井泉自中而滿非有來處鄭曉曰濟水凡三伏而四見一見于玉屋而遂伏再見而爲濟再伏而入河三見而爲滎三伏而穴地四見而出陶邱之北自此不復伏矣胡渭曰伏見之說

二孔無之然泰澤一伏東邱一見本水經注武德入河再  
伏滎陽軼出再見本唐書許敬宗傳益濟瀆所經之地其  
下皆有伏流遇空竇卽便涌出故一見於滎澤再見於陶  
邱不必以入河之濟爲上源亦不必并泰澤東邱數之爲  
三伏三見也又曰杜佑曰濟水之在河北者王莽時此水  
枯涸水但入河而已不復截河而南而水經叙濟乃一依  
禹貢舊道此不詳之甚黃度曰濟水雖絕其瀆猶在雖中  
閒穿鑿變易或斷或續然水之附入於其瀆者猶可尋求  
緝之以存禹迹非無理佑言爲過程大冒曰克豫之境凡  
水自南北濟以行者皆循濟故道不獨荷汶顧荷汶特其大  
而可數者耳今世所稱南北清河者皆古濟流派而荷汶



則其要會也陶邱以東適與荷會而遂分派會泗水以注於淮者濟之注河而分者也東北兼汶與之同入于海者濟之正派也此二者比濁河清故後世以南北清河目之于欽齊乘入濟之汶卽今大清河于慎行筆塵大清河第得汶之首尾實以東平諸泉由濟故瀆入海案二子皆山東人皆實指大清河爲濟也又曰曾氏曰職方云其川榮維者禹時爲榮澤而已至周則爲川據此禹時榮澤渟而不流後人導爲榮川其說創自彥和蓋陶邱榮澤相去可五百里榮澤至周時已導爲川與陶邱復出之濟相接自榮口石門至東逕宛胸縣南皆禹後代人所導職方豫州之川水經謂之榮瀆而河濟合焉者也過此則爲陶邱

復出之濟矣。○塗按水經云又東北過甲下邑入於河又東北入海注云河水入濟非濟入河此酈注之駁正經文者也。又東北入海五字戴氏震謂此注之混於經者也。註引郭景純曰濟自滎陽至樂安博昌入海此酈氏自證其說也。○周氏柄中曰閻百詩曰余嘗討論濟瀆至五載評以二言曰新莽後枯而復通唐高宗前通而復枯愚按有北濟有南濟北濟王莽時大旱枯絕其後復通南濟自東漢時滎澤旣堙而陶邱之流遂絕水經叙濟水自滎陽以下之道乃河水之行於濟瀆者實非濟也酈注所云枯後復通津渠勢改但當指北濟言蓋北濟初於河內武德入河後于溫縣入河是卽所謂津渠勢改者而南濟實無復

通之事閻氏亦考之未審也愚竊更定之云北濟新莽時  
枯而復出南濟東漢後絕而不通

### 漯

漯出今曹州府朝城縣○尙書後案云前漢志東郡東武  
陽下云禹治漯水東北至千乘入海過郡三行千二十里  
續志則但云東郡東武陽漯水出案東武陽今朝城縣也  
應劭云在武水之陽酈道元謂武水卽漯水其故城在今  
縣西漢志言漯水所經除東武陽尙有四縣一平原郡高  
唐二濕陰三千乘四濕沃也過郡三者謂東郡平原千乘  
也水經注無漯水惟第五卷敘畢河事更說河之支流其  
文云河水又東北逕委粟津河北卽東武陽也漯水出焉

上承河水于武陽縣東南西北逕武陽西城東引水北注  
又東北逕陽平縣之岡城西又北絕辛道或西北又東北  
逕樂平縣故城東又北逕聊城縣故城西又東北逕清河  
縣故城北又東北逕文鄉城東南又東北逕博平縣故城  
南右與黃溝合溝承聊城郭水自城東北出逕清河城南  
又東北逕攝城北又東逕文鄉城又東北出高唐注濕水  
桑欽地里志曰濕水出高唐案穆天子傳丁卯天子自五  
鹿東征釣于漯水己巳天子東征食馬於漯水之上尋其  
沿歷不得近出高唐桑氏所言蓋津流出次於其閒也俗  
以上承于河亦謂之源河矣濕水又東北逕援縣故城西  
又逕高唐縣故城東又東北逕濕陰縣故城北又東北逕

著縣故城南又東北逕崔氏城北又東北逕東朝陽故城南又東逕漢徵君伏生墓南又東逕鄒平縣故城北又東北逕東鄒城北又東北逕千乘縣二城閒又東北爲馬常坑坑東西八十里南北三十里亂河枝流而入于海以今輿地言之朝城莘縣堂邑聊城清平博平禹城臨邑濟陽章邱鄒平齊東青城高苑諸州縣界中皆古漯水所經也○禹貢錐指云河旣與漯合復分爲二濕由濕陰故城北河由平原故城東蓋自高唐以西至武陽河在南而濕在北自高唐以東至海則漯在南而河在北矣○地里今釋曰今朝城縣南有漯河陂廣十餘里又高苑縣北有漯河禹城縣西二里有漯河東北入臨邑縣界蓋朝城漢之東

武陽高苑漢之千乘禹城漢之高唐也漯水本出高唐至千乘入海自禹導河至大伾始分河之一支又東北流首經東武陽至高唐合漯水則高唐以南武陽以北之河皆被以漯名矣漢志於高唐注云漯水所出於東武陽則云禹治漯水東北至千乘入海漯水源流固瞭然矣○張參五經文字曰漯水字本作濕經典相承作漯而以濕爲燥溼之溼○禹貢錐指曰禹引河自大伾山西折而北循大陸東畔入河而漯首受河自黎陽宿胥口始不起東武陽也自定王五年河徙從宿胥口東行漯川至長壽津始與漯別津以西漯水之故道悉爲河所占而上游較短然河之故瀆不經東武陽亦不經高唐迨漢成帝末河決館陶

由東武陽絕漯水而東北至高唐又絕漯水東北至千乘  
入海明帝永平中王景修之遂爲大河之經流自是委粟  
津以西漯水之故道悉爲河所占上游益短矣漯水一出  
于東武陽再出于高唐據成帝後言耳○璽按漯之受河  
雖自宿胥口始然委粟津以上自是河之分流至武陽合  
漯而始被以漯名高唐乃其源之再出者胡氏謂據成帝  
後言之殆未然也

### 汝

汝出今汝州魯山縣○括地志云汝水源出魯山縣西伏  
牛山亦名猛山汝水至豫州鄆城縣名瀆水○水經汝水  
出河南梁縣勉鄉西天息山東南過其縣北又東過潁川

郟縣南又東南過定陵縣又東南過鄆縣北又東南過汝  
南上蔡縣西又東南過平輿縣南又東至原鹿縣南入於  
淮酈注云地理志曰出高陵山卽猛山也亦言出南陽魯  
陽縣之大孟山又言出宏農盧氏縣還歸山博物志云汝  
出燕泉山並異名也今汝水西出魯陽縣之大孟山蒙栢  
谷西卽盧氏界也○方輿紀要曰今汝水出汝州魯山縣  
西南七十里大孟山東北流出縣北經伊陽縣汝州南又  
東南經寶豐縣郟縣南入南陽府裕州界經葉縣北又東  
入許州之襄城鄆城縣南而入汝寧府西平縣境東南流  
經上蔡縣西汝陽縣北又東經新蔡縣西息縣北至江南  
潁州南而注于淮蓋非復漢以前水道矣○水道提綱曰



汝水舊從舞陽縣北而南入西平界自元末於渦河竭斷其流使東歸潁於是西平雲莊諸石二山之水明時亦塞今水道與古全異○焦氏循曰汝水禹貢無之漢書地理志汝南郡定陵云高陵山汝水出東南至新蔡入淮過郡四行千三百四十里南陽郡魯陽縣注云有魯山滢水所出東北至定陵入汝又有昆水東南至定陵入汝續郡國志潁川郡亦有定陵劉昭于潁川定陵引地道記云高陵山汝水所出汝南定陵蓋卽潁川定陵前漢有一縣分隸兩郡者定陵在汝南潁川之間故分屬之光武時省併爲一故續志屬潁川耳班氏於魯陽滢水至定陵入汝於定陵序汝入淮定陵以西統汝于滢滢亦汝也連滢水數之

歷南陽河南潁川汝南故有四郡杜預春秋釋例郭璞山海經注並云汝出魯陽縣大孟山東北至河南梁縣東南經襄城潁川汝南至汝陰褒信縣入淮襄城晉置汝陰魏置在晉則歷六郡也說文言汝水出宏農盧氏還歸山班志盧氏縣熊耳在東伊水出東北然則漢時盧氏縣在伊水之南與魯陽接壤酈氏目驗之故水經注言汝出魯陽縣大孟山蒙柏谷西卽盧氏界許氏雖與班氏異而其指則同若水經言出河南梁縣勉鄉西天息山此本山海經非班許義也酈注于滎汝分流始言汝水趣狼臯山狼臯在梁縣西南六十里見寰宇記蓋汝自魯陽越百餘里始至梁縣元和志謂出魯山縣是也謂出魯山縣之天息山

是又以魯陽大孟混入勉鄉之天息也淮南子地形訓云  
汝水出猛山猛與蒙柏谷長短讀蒙谷卽猛山而猛與孟  
形近而譌大孟山卽猛山也○樊氏廷簡曰水經滎水篇  
註滎水又與波水合水出霍陽西川大嶺東谷卽應劭所  
謂孤山波水所出也馬融廣成頌曰浸以波滎其水又南  
逕蠻城下波水又南分三川于白亭東而俱南入滎水滎  
水自下兼波水之通稱也是故鬪駟有東北至定陵入汝  
之文全氏祖望曰周禮豫州其浸波滎康成師古皆不知  
波水所在而以滎波之波當之後人或疑其非而以爾雅  
洛出爲波之波當之不知滎洛旣爲川矣不應復以其支  
流爲浸也書滎波旣豬鄭賈以波爲播古作蟠若從豫州

之浸波差則不必改字矣禹貢無治汝之文而孟子有之  
明乎波爲霍陽之水是卽禹之治汝也又按水經注湛水  
出魚齒山西北東南流入汝襄公十六年楚公子格及晉  
師戰於湛坂杜預亦以是水爲湛水矣周禮荊州其浸潁  
湛鄭元云未聞蓋偶有未檢也左傳杜注襄城昆陽縣北  
有湛水東入汝彙纂云今葉縣北二十里有昆陽城趙一  
清曰漢志註師古曰潁水出陽城陽乾山宜屬豫州許慎  
又云湛水豫州浸蓋川土相鄰故也全祖望曰周禮荊州  
之浸潁湛案湛是汝水支流而潁亦與汝互相出入之水  
也又豫州之波亦汝水支流然則汝雖不見于禹貢未嘗  
不重於職方康成旣不知湛水又不知波水非善長之註

何以證明之哉全氏又曰詩遵彼汝墳蓋汝旁之水爲濱則汝旁之土亦爲濱謂突起也毛公乃以大防解之非也觀孟子則汝水宜決不宜防也

### 淮

淮出今南陽府桐柏縣○水經淮水出南陽平氏縣胎簪山東北過桐柏山東過江夏平春縣北又東過新息縣南又東過期思縣北又東過原鹿縣南汝水從西北來注之又東北至九江壽春縣西泚水泄水合北注之又東潁水從西北來注之又東過壽春縣北肥水從縣東北流注之又東過當塗縣北澗水從西北來注之又東過鍾離縣北又東北至下邳淮陰縣西泗水從西北來流注之

又東過淮陰北中瀆水

出白馬湖東北注之又東兩小水流注之又東至廣陵淮浦縣入于海○說文淮水出南陽平氏桐柏大復山東南入海○段氏玉裁曰今桐柏縣有平氏故城前漢志云平氏禹貢桐柏大復山在東南淮水所出至淮陵入海過郡四行二千二百四十里按桐柏大復山以四字爲名禹貢祇云桐柏省言之也今淮水自桐柏山東流經羅山縣真陽縣息縣固始縣光州又入江南界經潁州府霍邱縣潁上縣壽州懷遠縣鳳陽府臨淮縣五河縣盱眙縣泗州至清河縣合於河經山陽縣阜寧縣安東縣至雲梯關入於海古水道河於冀州入海不與淮同入海淮之古水道今

未有異淮自平氏至入海大致東北行東多北少許云東南南字誤也○禹貢台注曰淮但可導之以入海而必不能使之由湖以入江淮南之地由高寶而東則俱下由邵伯而南則又昂淮之不得達于江也地限之也○孫氏蘭輿地隅說云淮水發源胎簪至桐柏流百里而伏溢爲二潭又流千里會泗至清江浦入海揚州地勢散漫不能約束淮流禹則開清江一渠堰其下流入揚之處一自清江浦入海其餘波之流散不盡者又導之由廬州巢湖胭脂河以入江又導之由天長六合以入江所謂排淮泗者也久而入江之口漸淤今故蹟猶存也或曰高堰始于陳登是不然若禹不築堰則下流散漫何以入海蓋高堰創於

神禹修補或登耳○孫氏星衍曰孟子言排淮泗而注之江今不得其解或以爲誤或以爲據吳溝通江淮之後言之不知禹貢揚州已云沿於江海達于淮泗解者謂沿江入海自淮入泗此僞孔之言本不足信貢道迂回海運古無是法又有泥四瀆各自入海以爲淮不注江者不知各自入海言入海處與江分道不謂上游支流也孟子言排者通其上游支流以殺淮之勢水經注淮水與泚水泄水施水合泄水注濡須口施水受肥水東南流逕合肥縣又東注巢湖謂之施口而應邵漢書注並以夏水爲出城父東南至此與肥合故曰合肥合肥壽春之間有芍陂船官湖逍遙津見於水經注王象之輿地紀勝云古巢湖水合



於肥河故魏窺江南則循渦入淮自淮入肥合肥受南北  
湖貨殖傳誤作潮也歐陽忞輿地廣記王存元豐九域志  
合肥有肥水淮水宋時廬州有鎮淮樓蓋肥合於淮淮水  
盛則被於肥此淮水至合肥之證孫叔敖時開芍陂當因  
舊迹爲渠方輿勝覽引合肥舊志肥水北支入淮南支入  
巢湖合于爾雅歸異出同之說合肥城在四水中故梁韋  
叡堰水硤城近世水利不修淮肥流斷然巢湖之水夏間  
猶達合肥也且古說大別在安豐爲今霍邱地禹迹至此  
排淮故導江有至大別之文此亦淮流與江通之證也然  
則禹時貢道正可由巢湖溯施肥水之流通淮達於荷澤  
荷澤合沛泗之流故曰達於淮泗從此達河則至帝都矣

江淮泗通流不必在吳王溝通之後也淮之上游壽春東則有施肥通流西則有芍陂宣洩盛夏水漲則逕合肥入巢湖以達于江故宋以前淮流不爲洪澤湖之患也○焦氏循曰說者疑淮泗不入江乃汝亦入淮不入江而孟子以汝漢並稱爲決下承注江豈孟子不知淮亦不知汝耶嘗細推之有精義焉淮自桐柏而東在上則汝潁沙渦等水入之在下則泗挾沂入之以一淮受諸水泗口以東地勢散漫難於專流入海故在上則決之在下則排之趙氏以壅解排其義爲至精何爲壅於泗口之下築堤以束之不使其流漲洩於樊良射陽之間則推抵之使東入于海有此排而淮乃挾泗入海而不致南漲於江矣乃壅障之

功施于泗入淮以下而汝潁諸流之入於淮者則不可以  
此壅之故於泗口以西決之使注于江此地泗未入淮所  
決者淮實決汝也泗既入淮所壅者淮實壅泗也言排泗  
而沂在其中言決汝而潁渦等水在其中下以泗與淮並  
言此汝卽入淮之汝不可言決淮汝故云決汝漢是時漢  
在六安安豐之間入江汝入淮而決之入江蓋與漢合故  
云決汝漢謂決汝以合于漢而南注之江也蓋注江者汝  
漢之決也注海者淮泗之排也以上文言注諸海故此但  
言注江此古人屬文互見之法也以今推之汝水至汝寧  
鳳陽之閒汝口入淮至霍邱西決出會於巢湖入江淮決  
卽汝決而汝入淮之勢洩矣又東則潁水自潁上縣入淮

沙水渦水自懷遠縣入淮而淮勢又盛至盱眙又決出由  
天長六合入江而潁沙渦諸水入淮之勢又洩矣又東泗  
沂乃自宿遷入淮而淮勢又盛遂不決之入江而轉壅障  
入江之路排之事由安東入海汝入淮則決之使合漢水  
以注之江泗入淮則擁之使並入于海故云決汝漢排淮  
泗而注之江自漢不至安豐而汝漢之合遂莫可解孟子  
稱決汝漢可以見當時之地益知杜預鄭元疑大別不在  
安豐之非也詩言江漢浮浮孔氏正義引大別在廬江安  
豐縣界則江漢合處在揚州之境漢近淮故淮水之決出  
者與之合不言決淮而言決汝漢明決淮所以決汝入淮之  
勢不言決汝淮而言決汝漢明決淮所以決汝入漢之勢

也淮決於六安安豐閒入漢與漢合入江也

### 泗

泗出今兗州府泗水縣○說文泗水受洙水東入淮○段氏玉裁曰地理志濟陰乘氏下云泗水東南至睢陵入淮過郡六行千一百一十里又魯國卞縣下云泗水出縣北西南至方輿入洙過郡三行五百里青州川出乘氏者其遠源出卞者其近源過郡三當作過郡二者魯山陽也水經泗水出魯卞縣北山西南過魯縣北西過瑕邱縣東屈從縣東南流洧水從東來注之又南過平陽縣西又南過高平縣西洸水從西北來流注之又南過方輿縣東荷水從西來流注之又屈東南過湖陸縣南洧洧水從東北

來流注之又東過沛縣東又東南過彭城縣東北又東南過下邳縣西又東南入於淮此舉卞縣以下二郡也卞縣故城在今泗水縣東五十里許云受沛水則又舉其源之至近者也水經言沛水又東過湖陸縣南東入於泗水前志言泗水至方輿入沛酈氏云泗沛合流故地紀或言濟入泗亦言泗入沛胡渭曰泗水自泗水縣歷曲阜滋陽濟寧鄒縣魚臺滕縣沛縣徐州邳州宿遷桃源至清河縣入淮此禹迹也今其故道自徐州以南悉爲黃河所占矣○水經注水出卞縣故城東南桃墟墟有澤澤方十五里澤西際阜俗謂之媽亭山自此連岡通阜西北四十餘里便得泗水之源也石穴吐水五泉俱導泉穴各徑尺餘西南

流逕魯縣分爲二流北爲洙瀆南則泗水○閻氏若據曰  
按浮于淮泗達於河說文作荷爲是蓋荷者澤名爲濟水  
所經又東至于荷者是在豫之東卽徐之西北舟則自淮  
而泗自泗而荷然後由荷入濟而達于河以上文兗州浮  
于濟漯達于河次青州便浮于汶達於濟不復言達于河  
矣又次徐州浮于淮泗達於荷亦不復言達於濟矣至揚  
州則沿于江海達于淮泗亦不復言達于荷矣不復言者  
蒙上文也

四書地理攷卷十一終